



## **KENYATAAN MEDIA**

### **TELEFILEM 'SIBERKASA'**

### **PERKASA KESELAMATAN SIBER KELUARGA MALAYSIA**

---

**KUALA LUMPUR, 9 DISEMBER 2021** – Buat julung kalinya, Keluarga Malaysia akan dapat melihat secara dekat realiti sebenar cabaran yang ditempuhi oleh juruanalisa di CyberSecurity Malaysia dalam menjalankan amanah dan tanggungjawab melindungi negara, melalui telefilem 'SiberKASA'.

'SiberKASA' terbitan Perbadanan Kemajuan Filem Nasional Malaysia (FINAS) dengan kerjasama CyberSecurity Malaysia, iaitu agensi di bawah Kementerian Komunikasi dan Multimedia Malaysia (KKMM), merupakan telefilem mengenai keselamatan siber yang diangkat berdasarkan kisah benar mengenai isu-isu keselamatan siber yang berlaku setiap hari dalam Keluarga Malaysia.

Telefilem berdurasi 90 minit arahan YM Raja Mukhriz bin R. Ahmad Kamaruddin ini dilancarkan oleh Menteri Komunikasi dan Multimedia, YB Tan Sri Datuk Seri Panglima TPr Annuar Haji Musa sempena Pameran 100 Hari Aspirasi Keluarga Malaysia yang berlangsung selama empat hari bermula dari 9 hingga 12 Disember 2021, bertempat di Pusat Konvensyen Kuala Lumpur (KLCC).

Tan Sri Annuar berkata, Keluarga Malaysia telah menerima serta menggunakan teknologi dan Internet sebagai gaya hidup era digital masa kini. Namun di sebalik penggunaan tersebut, mereka tidak mengamalkan tingkah laku yang sewajarnya malah masih ramai menggunakan teknologi secara negatif, tidak beretika dan tanpa sikap bertanggungjawab menyebabkan Keluarga Malaysia terdedah kepada ancaman dan serangan siber yang menimbulkan ketidakharmonian sosial dalam Keluarga Malaysia seterusnya menggugat kesejahteraan negara.

Justeru, telefilem 'SiberKASA' ini diharap dapat dijadikan sebagai salah satu cara mendidik masyarakat memahami trend mutakhir ancaman siber, modus operandi jenayah siber serta amalan terbaik yang perlu diamalkan oleh warga digital Keluarga Malaysia sewaktu menggunakan teknologi dan Internet.

Tan Sri Annuar turut menggesa Keluarga Malaysia agar mengambil iktibar insiden-insiden dan ancaman siber yang berlaku bagi mengelakkan diri daripada menjadi mangsa serangan siber. Selain itu, warga digital dalam Keluarga Malaysia perlu memiliki kawalan sendiri sewaktu menggunakan teknologi, Internet dan media sosial.

Beliau turut berharap, penerbitan telefilem ini dapat meningkatkan kesedaran dan pengetahuan warga digital Keluarga Malaysia mengenai ancaman dan serangan siber serta mampu menyemai sikap positif dan cakna terhadap penggunaan teknologi melalui babak yang dipaparkan menerusi telefilem ini.

Telefilem yang merupakan karya ulung berkaitan bidang keselamatan siber dengan barisan pelakon seperti Zulhuzaimy, Thanuja Ananthan, Mona Allen, Qi Razali dan Riz Amin ini juga diharap dapat mempromosi bidang keselamatan siber di Malaysia dan memberi manfaat kepada golongan belia khususnya dalam memupuk minat mereka menceburi bidang keselamatan siber dan berbakti kepada negara sebagai pelindung keselamatan siber.

Kesemua prosedur dan pengoperasian yang dipaparkan mengikut kaedah tatacara kerja sebenar dan bukan hanya sekadar lakonan. Selain memberi gambaran jelas tentang bidang kerjaya juruanalisa keselamatan siber, telefilem ini dapat mewarnai industri perfileman negara dengan kepelbagaian genre.

Telefilem 'SiberKASA' dijangka akan mula ditayangkan pada hujung tahun 2021. Keluarga Malaysia boleh menonton telefilem ini di saluran media tempatan.

~ Tamat ~

---

Untuk maklumat lanjut, sila hubungi:

**Mohd Shamil Mohd Yusoff**

Ketua Jabatan  
Jabatan Outreach & Komunikasi Korporat  
CyberSecurity Malaysia  
Emel: [media@cybersecurity.my](mailto:media@cybersecurity.my)

**Muzri Abdullah**

Ketua Unit Komunikasi Korporat  
Perbadanan Kemajuan Filem Nasional  
Malaysia (FINAS)  
Emel: [unitkomunikasikorporat@finas.my](mailto:unitkomunikasikorporat@finas.my)

## **SINOPSIS**

Telefilem 'SiberKASA' memaparkan kisah sistem sebuah loji di Semenyih yang digodam mengakibatkan kegagalan sistem dan berlaku pencemaran. Kesannya mengakibatkan pengguna gagal mendapatkan sumber air bersih sehingga mengalami keracunan dan juga rusuhan.

Zahid berdepan dengan masalah, apabila adiknya Kamelia ditangkap atas pertuduhan pecah amanah. Puan Mastura mendesak untuk Zahid membantu adiknya sedangkan Zahid tersepit antara kerja dan keluarga. Serangan demi serangan dilancarkan ke atas sistem loji menyebabkan ia semakin lumpuh.

Syarikat bekalan air tersebut semakin hilang kepercayaan pengguna, begitu juga Zahid yang hilang kepercayaan ibunya sendiri apabila Kamelia dijatuhkan hukuman. Namun, di sebalik kekalutan tersebut, Zahid telah berjaya mengetuai pasukannya untuk mematahkan serangan penggadam.

Akan tetapi, kejayaan tersebut telah membuatkan Zahid memilih untuk meninggalkan CyberSecurity Malaysia dan memberi tumpuan kepada keluarganya seperti yang diminta oleh ibunya. Sesuatu yang mengejutkan telah berlaku, benarkah Kamelia tidak bersalah?